

օտար երկրներում բախտ որոնել: Եւ քանի՛ հազար թշուառ ընտանիքներ այժմ մնացել են առանց տղամարդկերի. միայն Կոստանդնուպոլսում այժմ 40 հազար հայ պանդուխտներ կան, եւ նրանց մեծ մասը վանեցիներ են: Ի՞նչ անէ խեղճ գիւղացին, որ չգաղթէ: Թողեալ այն, որ նրան կողոպտում է թուրքը, քուրդը եւ տերուծեան պաշտօնեան, – նոյնիսկ իր արիւնակիցը, իր կրօնակից հայը նրա կեանքի զօրութիւնը ծծում է, նրան խեղճութեան եւ թշուառութեան մէջ է զգում: Տաճկաստանի բոլոր քաղաքները լցոած են հայ մշակներով կամ հայ համալներով. – բայց դրանք մեր երկրի գլխաւոր ուժերն են, որ մաշւում են եւ ոչնչանում են պանդխտութեան մէջ:

– Դուք տեսաք, – շարունակեց նա, – որ հայ դրամատերերը, հայ վաճառականը՝ մեր հասարակութեան բոլորովին աւերոած եւ վնասակար մասն է. նրանցից մենք ոչինչ բարիք չենք սպասում: Նրանք պաշտում են իրանց քսակը եւ աւելի ոչինչ: Վաճառականը ազգ եւ հայրենիք չունի, նրա հայրենիքն այնտեղ է, որտեղ են նրա շահերը: Եւ այս տեսակ վաճառականութիւնը (երէ կարելի է վաճառականութիւն կոչել) աւելի վտանգաւոր է դառնում, երբ նա ներքին կապ ունի կառավարութեան պաշտօնակալների եւ նրանց անիրաւ գործունեութեան հետ: Դուք շատ անգամ եւ շատ տեղ տեսած էք այս բանը. օրինակ, գիւղացին պատրաստի արծաթ չունի եւ հարկի փոխարէն տալիս է իր արդիւնաբերած նիւթի մի մասը. հարկահանը չէ ընդունում, եւ ոչ ժամանակ է տալիս նրան, որ կանոնաւոր կերպով վաճառէ եւ հարկը լրացնէ: Դուք տեսնում էք, որ իսկոյն յայտնւում է հայ վաճառականը, եւ օգուտ քաղելով գիւղացու նեղ դրութիւնից, խոստանում է հարկահանի փողը տալ, եւ խիստ ջնջին գնով առնում է գիւղացու դառն աշխատութեան պտուղը: Հիմա տեսնո՞ւմ էք, դրանք բոլորն էլ թեռի պետրոսներ են, միայն զանազան կերպարաններով... – Թեռի Պետրոսներին միշտ ձեռնտու է միանալ քուրդ իշխանների հետ եւ դաւադրութիւն մեքենայել մեր դէմ...

Ասլանի ասածները ես բոլորը հասկանում էի, որովհետեւ իմ փորձած եւ տեսած բաներ էին: Կարծես թէ, ես բոլորը առաջուց գիտէի, թէ ոչ մի անգամ իմ մտքով անցած չէին նրանք, եւ ոչ մի անգամ իմ ուշադրութիւնը գրաւած չէին: Կեանքի խօսքը միշտ հասկանալի է լինում մարդուն, որքան եւ նա անզգայ լինէր, որովհետեւ այն խօսքը ուղղակի վերաբերում է նրա գոյութեան պահանջներին:

– Այս բոլորը հասկանում եմ, – ասեցի ես, – թէ ինչո՞ւ թեռի պետրոսներն այսպէս են վարւում, բայց չեմ հասկանում մի բան, թէ մեր տէր Թողիկներն ի՞նչ շահ ունեն միանալու դրանց հետ: